



Minggu, 22 Nopember 2020

Ogen: Jop 14:2



Desken Rudang-rudang



Tuhuh kegeluhen bas doni enda gendek kal ngenca, janah lanai terulihi. Nina kin sada istilah "air yang kita pijak di sungai yang sama, jam yang sama tapi di lain hari tidak akan pernah sama." Bagenda me situhuna, labo beluh manusia ngulihi masa-masa si enggo lepas. Tapi megati lit kange si atena ngulihi waktu sabap lit penyesalen i bas ia makeken waktuna alu sia-sia. Kitab Job ngatakan banta, maka kegeluhenta enda desken rudang-rundang nge ngenca. Kentisik ngenca perterlak jilena ras merimna, bage ia terlak je ka ibenaken permelusna jenari japape lanai bo lit. Jadi uga nge carana ndalani geluh si kentisik enda? Si pakeken wari-wari si ibereken Tuhan alu ndahiken si erguna, subuk man dirinta, man isi jabunta, man keluarga, man teman sekelewet ras man lingkugenta. Bagi rudang-rundang ndai amin kentisik ngenca ia terlak tapi enggo mereken aroma si merim ku sekelewetna, mereken warna si mejile, sehat mata natapsa. Entisik tapi erguna.

La obahna bagi kegeluhen Jesus si kentisik bas doni enda tapi seh kal terakapna man banta. La itanggungina erbahan si mehuli, erkorban pe IA labo akapna mberatsa, dareh ras kesahna iasamkenna guna kita ras doni enda. Sedekah IA nggeluh iperdiatekenna si mberat baban geluhna, isampatinna si musil, ipepalemna si pinakiten, ras ibereNa man si kelihen. Enda me usihenta ndalani geluh si kentisik si ibereken Dibata man banta. Bancinge kita ndarami keperluan geluhna, keriahen bas doni enda, tapi ula e utama perayakenta. Geluh enda bahanlah desken ziarah kiniteken. Ertina desken sada perdalanen, guna ndatken sada tujun. Tujunta si tuhu-tuhu eme kegeluhen si rasa lalap. Guna datken tujun e banci saja lit kesusahen, ras kebiaren. Tetap ngatakan bujur i bas kerina situasinta. Lakoken si mehulina, ula tertaren-taren ntah pe nahan-nahan kiniulin si arus isehken man kalak si deban.

